

Bortaduras mesi de idas 2022 – Dicembre 2022

05/12/2022

PROTZEDURA DE SÈBERU PÙBLICU PO PERSONALI TÈNNICU PO PROGETUS PNRR

Su Comunu de Santu Giuanni Suèrgiu fait sciri ca est ativa sa protzedura po su sèberu de n. 1 espertu po ddi donai s'incàrrigu de traballu autònomu de perfilu FT (tènnicus) me in su campu de professionista middle o subòrdine junior po unu tempus màssimu de 36 mesis. Sa dimanda depit essi fata in PDF e sinniada cun firma digitali e tocat chi su candidau dda intreghit de sa mail cosa sua (cunforma a s'art. 65 D.Lgs. n. 82/2005), est a nai cun sa PEC a nòmmini suu, a s'indirìtzu ufficio.protocollo@pec.comune.sangiovannisuergiu.ci.it
ACABU PO PRESENTAI IS DIMANDAS: a is 23:59 de su 15 de mesi de idas 2022

05/12/2022

PROTZEDURA DE SÈBERU PÙBLICU PO PERSONALI – PERFILU ISTRUTORI DIRETIVU ASSISTENTI SOCIALI CAT. D1

Su Comunu de Santu Giuanni Suèrgiu fait sciri ca ant inghitzau a tzerrias is idoneus, impari e gràtzias a s'acòrdiu fatu cun ASMEL, po s'assuntzioni de n. 2 ISTRUTORI DIRETIVU ASSISTENTI SOCIALI CAT. D1, cunforma a s'art. 3 bis de su D.L. 80/2021.
ACABU PO PRESENTAI IS DIMANDAS: intre de 15 diis a pustis de ai donau sa comunicatzioni po PEC a totus is iscritus chi funt resulta us idoneus.

05/12/2022

PROTZEDURA DE SÈBERU PÙBLICU PO PERSONALI – perfilu de istrutori amministrativu Cat. C

Su Comunu de Santu Giuanni Suèrgiu fait sciri ca ant incarrerau, impari e gràtzias a s'acòrdiu cun ASMEL, sa lista de is idoneus po n. 5 ISTRUTORIS AMMINISTRATIVUS, Cat. C a tempus prenu e indeterminau.
ACABU PO PRESENTAI IS DIMANDAS: intre de 15 diis a pustis de ai donau sa comunicatzioni po PEC a totus is iscritus chi funt resulta us idoneus.

06/12/2022

Oi su 6 de mesi de idas s'afestant is chi si tzerriant Nigola, Nicolao e Nicolò. Santu Nigola de Myra fut unu obispu onorau de sa crèsia catòlica, ortodossa e de àteras religionis cristianas. Ddu considerant unu santu miroblita, est a nai ca de su corpus suu ndi bessit unu fragu aggradosu e ndi calat unu ollu miraculosu. Est connotu puru cun su nòmmini de Santu Nigola de Bari poita is relìchias suas funt arreguadas ingunis. Sa beridadi est chi una truma de marineris de Bari in su 1087 fiant andaus a Myra po circai de ndi furai calincunu arremu de su Santu, casi ca fiat nomenau po essi miraculosu. In su 1089 iant pesau puru sa crèsia po issu. Sa matessi cosa fiat acuntèssia dexi annus a pustis cun is marineris venetziarus, chi iant arregortu is arrestus de is relìchias furadas de is baresus iant agatau ossus e ddus iant portaus conca a domu insoru e oi s'agatant in sa crèsia de San Nicolò al Lido. Su cultu de Santu Nigola inghitzat in su tretu de s'Àsia Minori in su sèculu VI e prus che totu in su Mesuevu si fut fatu connosci aintru de su cristianesimu gràtzias a is contus de fainas miraculosas fatas a genti pòbura e a piciocheddus. De issu s'est originada sa figura de San Nicolò chi me in sa noti intre su 5 e 6 de mesi de idas portat presentis a is pipius. Non sceti in Itàlia ddoi at su cultu de Santu Nigola: est su patronu de sa Lorena (regioni de sa Fràntzia), de Amsterdam e de sa Rùssia. Me in su Nortu (Artu Àdige, Friuli Venètzia Giùlia) e me in is tretus de is Alpis intre Itàlia e Àustria, Slovènia e Svìtzera, Santu Nigola est figurau

ancora cun sa bistimenta de obispu, su capeddu e su bàculu in s'interis de ndi sciuidai is krampus, genia de dimònius malus.

Me in is Paisus nòrdicus e in Amèrica invecias at pèrdiu su essi unu santu e s'est fatu prus che totu a figura làica e legendària. De su 1800 San Nicolaus est mudau a Santa Klaus e rapresentat su Babu Nadali chi conosceus oi, pintau che unu òmini brabudu e prexau chi spàinat arregallus a totus is pipius.

E tui dda conosciast sa stòria de Santu Nigola?

07/12/2022 Oh che barba, Babbo Natale!

Saludi pipieddus, oi si lìgiu unu contixeddu bellixeddu meda, ascurtai-mi-dda ca nc'est de si spassiai. Si tzèrriat oh che barba, babbo natale"

Babbu Nadali est diaderas infadau: sa braba sua, crescendi crescendi po annus meda, s'est fata longa longa ca imoi ddu strobat. Dda tenit strisiendi a terra arregollendi pruini e arrescendi in d-ònnia logu. Non nci dda fait prus nimancu a sestai is arregalus: sa braba arrescit in su spagu e si attrottoxat a su frocu! Non fait prus!

Is rennas dda mòssiant e is duennas da funt sempri tochendi: immoi est totu trobeddada! Sa noti de su 24 candu Babbu Nadali si cuncordat po partri, nci ponit aici meda po si dda pentonai ca no arrennescit a partì a s'ora sua. Candu a sa fini nci dda fait a bolai in su tragu, sa braba ddi andat me in is ogus e non biit nimancu!

Sa braba si nci carvat me in is fumaiolus e s'arrescit me in is cambus de is matas paradas a festa. Aici, sa dii de Nadali a mengianu is pipieddus spantaus agatant filus impratiaus asuba de is matas. Giai no ant a essi pilus de àngelu? Nossi, funt is pilus de sa braba de Babbu Natali! Ma su peus acuntessit candu cussu guturrosu de Babbu Nadali si satzat a scusi is pistocus fatus de is duennas.

Non si podit andai a innantis aici! Unu mengianu de su mesi de idas Babbu Nadali, arrosciu, scriit una lìtera a is duennas:

Cust'annu, po Nadali, non bollu ni botas, nì capotus, ni sonajous po is rennas e nimancu ciuculati. Cust'annu ia a bolli una arresoja elètrica.

Si promitu ca apu a fai a bonu e no apu a papai is pistocus de bosaterus!

Is duennas acollint su disìgiu de Babbu Nadali e issu, cun sa arresoja noa, si ndi segat sa braba chentza de si lassai nimancu unu pilu! Is segamentus funt spaciaus!

Po custu Nadali, is arregallus si imboddiant de pressi e Babbu Nadali podit papai totus is pistocus chi dd'arrechedint chentza de si fai cassai. Totu parrit andai beni fintzas a candu.... Babbu Nadali si cassat s'arresfriui!

Ellus, lobai ca fait frius in su Polo Nord. E chentza de sa braba cosa sua po ddu callentai est grai a nci passai s'ierru friarosu.

Ta lastima, sa noti de Nadali est arribada e Babbu Nadali tenit una callentura mala e si tremmit de conca a peis. Nci dd'at a fai a donai is arregallus a totus is pipieddus?

No timais, ca no est timarosu!

Po non nci fai abarraì mali is pipius, cust'annu puru est partiu bolendi in su bentu fridu cun su tragu suu e unu niaxi de pachitus. Teniat puru una labedda chi ddi calàt de su nasu! E agiumai ddu cassant donendi is arregallus!

A pustis Babbu Nadali s'est torrau a fai cresci sa braba, manna, longa e moddi, casi cumentu de cussa chi teniat a innantis!

S'est pràxiu? Fai-mi-ddu scì me in is cumentus

12/12/2022

IMU Imposta Municipali Pròpia 2022

Scadèntzia pagamentu saldu a su 16/12/2022

Su Comunu de Santu Giuanni Suèrgiu fait sciri ca su 16 de mesi de idas scadit s'acabu po su pagamentu de su saldu de s'IMU 2022.

Is pagamentus fatus a pustis de su 16/12/2022 ant a pòdiri essi fatus cun ravedimentu operosu.

Cumentu si pagat:

tocat a fai su versamentu diretu cumpliendi su F24 a sa posta o sa banca. Po fai su càlculu tocat a si collegai su situ www.amministrazionicomunali.it ponendi su còdixi catastali de su Comunu (G287), is alicuotas deliberadas de s'Enti, sa genia de fàbricu, is mesis e sa percentuali de possessu.

S'ammentat ca, is chi tenit partida IVA, depint fai su pagamentu sceti de manera telemàtica: o cun sa home banking opuru in su portali de Fisconline de s'Agentzia de is Intradas.

Su pagamentu depit essi fatu imperendi custu critèriu: finas a 49 centèsimus s'atundat po difetu, avatu de 49 centèsimus s'atundat po etzessu (es. si sa suma est de 115,49 € pagaus 115,00 €, si est de 115,50 € pagaus 116,00€.)

Esentzioni IMU 2022 po mori de su COVID

Cunforma a s'art. 78 de su D.L. 104/2022 s'IMU po is annus 2021 e 2022 non si depit pagai po is fàbricus de genia catastali D/3 imperaus po spetàculus de cìnema, po teatrus e po aposentus de cuncertus, a cundizioni chi is meris siant gestoris puru de is atividadis.

Po àteras informatzionis:

atobiai a s'Ufitziu Tributus su lunis de is 4 a is 6 de merì e su mèrcuris de is 10 a mesudì;

tzerriai a su nùmeru de telefonu 07816999324 su lunis e sa cenabara de is 10:00 a mesudì

imbiai una mail a s'indirìtzu ufficio.tributi@comune.sangiovannisuergiu.ci.it

13/12/2022

S'annu 2022 in su Comunu de Santu Giuanni Suèrgiu si serrat cun s'afestu po sa de dexi centenàrias de sa bidda: Francesca Marras connota de totus cummenti de Tzia Cicita, nàscia in Masainas su 12 de mesi de idas 1922. Sa s'indiga Elvira Usai e totus s'Aministratzioni Comunali dd'at donau una targa de arregordu po custa grandu tarea. Arratza de vida spantosa chi at tentu Tzia Cicita! Fèmina traballanti e religiosa meda, si fut cojada sa primu borta cun Serbaroi Cadoni nadiu de Riu Murtas e a pustis de 13 mesis, candu fiat aspetendi unu pipiu, si fut infiudada. Prus a innantis si fut cojada cun Pepi Caddeo de Santu Giuanni Suèrgiu e at tentu 3 fillus, 7 nebodis e netas e 9 nebodis e netas segundas. Totus me in su bixinau de bia Vittorio Emanuele dda stimant cummenti chi fessit s'ajaja insoru.

Immoi seus prexaus de podi nai ca sa bidda nostra tenit unu record: unu centenàriu d-ònnia milla abitantis!

13/12/2022

SEGUNDU AVISU PÙBLICU "REIS" - RÈDDITU DE INCLUSIONI SOTZIALI. LISTA DIMANDAS

Mesura regionali nomenada Reis (rèdditu inclusioni sotziali). Aprovu lista dimandas.

Su Comunu de Santu Giuanni Suèrgiu fait sciri ca, cun determinu n. 580 de su 01.12.2022, at aprovau sa lista de is dimandas po podi pediri su "Reis" - segundu avisu, alliongiau innoi.

S'ammentat ca s'isbursamentu de is contributus nci at a essi sceti cun sa partecipazioni ativa a su progetu giai apariciu e sutascritu. Is dimandadoris funt obligaus a fai sciri a su Comunu chi nc'est stètiu calisiat cambiamentu de sa dii chi ant intregau sa dimanda. Depint fai sciri chi nci funt stètius càmbius asuba de sa famiglia insoru, asuba de su rèdditu o de sa situatzioni de is benis (patrimoniale) e de su dinai chi ddis arribat de su RDC. Po ddu comunicai tocat a compilai su paperi alliongiau e ddu intregai a manu a s'Ufitziu Prìsia o a ddu imbiai a sa email ufficio.protocollo@pec.comune.sangiovanisuergiu.ci.it.

Po averiguai si su Reis est imperau beni, is benefitziarius depint puru allogai scontrinus, faturas, retzidas (ricevute) po ammostai, a s'Ufitziu Prìsia, is spesas chi ant tentu, d-ònnia dus mesis, intre sa de dexi diis de su mesi afatanti, impari a su mòdulu de rendicontu chi est alliongiau.

Càstia innoi po biri totus is paperis allongiaus: <https://bit.ly/3W7LmI>

14/12/2022

Oi s'agataus in sa pràgia de **Corongiuali**: facia a pari a sa bidde de Carloforti, Corongiuali est una plaja pitichedda cun s'arena mesu grussa de colori biancu brutu ammesturada cun terrixedda. S'acqua de su mari est bàscia, trua, mesu birdi e braxa e su fundali est de arena iscurusa. Su tretu est totu prenu de opinus e palas de su mari nci funt unus cantu de domus de is piscadoris: issus lassant sa barchita de linna cosa insoru (nomenada "ciu") oru-oru de mari.

Cumentis nci lòmpiri:

de Casteddu tocat a pigai sa statali 130 e s'ighiri faci a Carbònia. Furrari conca a Santu Giuanni Suèrgiu e de ingunis, a Matzàccara. De s'essida de Matzàccara pigai sa ruga a ovest e sighei is inditus po Corongiuali.

14/12/2022 - 20/12/2022

Pràgia de Portu Botti

In sa pràgia ddoi at unus cantu de montis de arena - cummentis is pràgias ca nci funt a innantis - sceti ca acabat cun unu cordoni fini. Su logu fut connotu meda me in is annus Cincuanta e Sesanta, is annus de is minieras, ca is familias arricas de is biddas allacanantis ddoi andant in s'istadi.

Sa pràgia est longa casi 3 chilòmetrus e mesu mancai su logu po si ponni est de unu chilometreddu, totu a arena bianca o a colori de cinixu. S'acqua de su mari est birdi groga cun lampus a colori de celu, su fundali fundudu cun arena ammesturada a pedras.

Sa cosa spantosa est ca ddoi at montixeddus de arena, una bella pariga, perou non si podit nai ca nc'est unu sistema de dunas. Su chi ddu fait unu logu arricu est sa presèntzia de stàinus aundi s'agatant mangonis e àterus pillonis tramudadoris.

Arrenguitzu meda est su biri is mangonis bolendi a s'ora de su scurigadroxu.

In d-ònnia mesi de s'annu Portu Botti e Punta Trettu funt logus abitaus de is chi faint atividadi sportiva cumentis su Kite surf, casi ca ddoi funt bentus fortis e su logu est adatu.

Custa atividadi s'est ammaniada meda in custus ùltimus annus e ndi fait aproliai genti de totu su mundu.

Cumentis nci lòmpiri:

de Casteddu tocat a tirai a sa statali 130, furriai a Silìcua e arribai a Giba. De ingunis tocat a ndi bessiri de sa bidde e a tirai faci a Igrèsias/Calasetta. Tirai deretu lassendi sa bidde a palas de bosàterus (seis in sa SS195) fintzas a candu agatais unu arrundou cun pedras in mesu de s'argioledda: sighei deretu ancora.

A sa fini agatais s'inditu po Portu Botti. Furriai a manu manca e caminai po 1 chilòmetru fintzas a aciapai is parchèggius de sa spiàgia.

19/12/2022

📍 Sa Pro Loco e s'Aministratzioni Comunali de **Santu Giuanni Suèrgiu**, impari a is assòtzius *Gli Equilibristi e Arco Club*, aparinciant is atòbius po **Paschixedda 2022** in Pratzza IV Novembre.

🏠 **SA DOMU DE BABBU NADALI** 🏠

S'aspetat custu merì a is 4 e mesu in pratzza IV novembre po nci spaciai su merì spassiendi-sì meda meda!

👨👩 Babbu Nadali at arriciri totus is pipieddus chi dd'ant a donai sa literedda insoru! Ddoi at atessi tzùcuru filau, pop corn e gigius!

🍷 **GRANDU GIOGHITUS IN LINNA** 🍷

Martis 20 de mesi de idas, de is 4 e mesu de merì finas a is 7 e mesu. in sa pratzza s'ant a cuncordai unus cantus de gioghitus de linna poi s pipius.

🇮🇹 **IL MERCANTE DI INDULGENZA** 🇮🇹

Mèrcuris 21 de mesi de idas, de is 7 a is 8 e mesu de merì me in s'apostu de su Consillu Comunali de bia Romana ant a fai custa cumèdia.

🎉 **BABYLANDIA** 🎉

Giòbia 22 de mesi de idas de is 4 e mesu a is 8 e mesu de merì, spetàculus e spàssiu po mannus e piticus.

🥜 **CASTANGIAS ARRUSTU E REFRISCU** 🥜

Cenàbara 22 de mesi de idas, de is 4 e mesu de merì finas a is 8 e mesu, spaciaus is atòbius s'Aministratzioni Comunali e sa Pro Loco ant a donai is saludus e ant a cumbidai castàngias arrustias!

19/12/2022

Mèrcuris 28 de mesi de idas, in Pratzza IV Novembre in Santu Giuanni Suèrgiu, de is 8 de mengianu finas a mesudì e mesu ddoi at a essi s'emoteca de s'AVIS comunali aici is donadoris ant a pòdiri donai su sànguini. A d-onniunu de issus ddis ant a fai is anàlis cunforma a sa lei 219/05 a amparu de sa saludi e a pustis ddis ant a cumbidai su murzu. Benei in medas!

21/12/2022

Sa **Càritas de Santu Giuanni Suèrgiu** apariciat una dii po coberai cosa de papai chi non si fait mala, po dda donai a is chi prus tenint abbisòngiu.

Candu? 📍

📅 Giòbia 5 de gennàrgiu 2023, de is 9 de mengianu a is 8 de noti

📍 Pratzza de crèsia

Siaus de bonu coru 🎁❤️📍



21/12/2022

Oi intraus de manera ufitziali me in su mesi de Gennàrgiu, primu de is doxi mesis de s'annu e unu de is prus fridus. Si pentzat ca su nòmini ndi bèngiat de su deus romanu Giano Bifronte, chi teniat duas facis chi rapresentànt s'inghitzu e s'acabu de d-ònnia cosa.

Su deus Giano, me in s'antigòriu, is romanus ddu biiant cumentis su babbu de totus is divinidadis, casi ca, sendi su criadori de is cosas, creiant ca s'agatàt giai de su cumintzu de su mundu

Giano ndi bennit de sa paraula latina "ianua" chi bolit nai genna: bieis cumentis s'assimbillant is fueddus? Su fatu chi tènghiat duas facis est po fai a biri chi de una parti castiat a su chi fiat, e de s'atra a su chi at a essi.

Sa matessi cosa fait pròpiu su mesi de Gennàrgiu chi fait de transidura intre su bèciu e su nou, castiendi prus che totu a su benidori. At a essi po custu chi in custu mesi fadeus unu niaxi de promisas cumentis sa de si ponni a dieta a pustis de is satzaduras de is festas? 😊

